


# LUNARI pal 2003



Mons. Ernesto Galupin

## Al “Bonsignôr” Galupin

Par presentâ al personâts che i “Scussòns” a àn volût ricuardâ chist an traviars lis paginis dal lôr biel lunari, o ài pensât di partî di bôt cun chista domanda: parcè plui di cualchidun a Romans, magari za navigât cui àins, cuant ch’al fevèla dal complanzût plevan don Ernesto Galupin, a lu nomèna come al “*nestri vièli Bonsignôr?*” Jò o pensi che la rispuesta e sedi za avonda clara in ta stessa domanda.

Cualchidun al dîs àncja, cun rasòn, che fin cumò a nol è scrit nuja in paîs par ricuardalu, magari cualchi libri ch’al nàvighi in ta sô vita e ch’al fasi cognossi, so redût ai zovins, la sô figura e la sô opera. Ancja chista e je vera, ma jò o soi sigûr ca prest o tart o un o chel altri al cjatarà l’ingjustrî just par maglâ la cjarta cui soi tancj ricuarts e cun dut al ben ch’al à fat pal nestri paîs.

No jè vera, invèzit, ch’al sedi stât dismenteât da înt, tant che jò o sai che un òmp di Romans a si à impegnât a pajâ, fin ch’al varà respîr, al cont dal lumin ch’al lûs parsora da sô tomba jenfri al nestri simitièri, e al à ancjemò dit ai soi di famèa, di continuâ a pajâ ancja cuant che lui stes al sarâ lât a tignigi compagnia.

Ma intant che spietûn l’inspiraziòn di cualchidun ch’al meti neri su blanc su la vita dal monsignôr, o cirîm di ricuardâlu un frighinî traviars al lunari dai “Scussòns”.

Ernesto Galupin al jera nassût a Vermeàn al 15 di avrîl dal 1884 e al si è formât come religjôs tal seminari teologic central di Gurizza. Al è stât ordenât predi in tal 1907, dopo di che a lu àn mandât a curâ lis animis prima a Grau e dopo su la Bruma a Gardiscja. A Romans al è rivât una prima volta al 25 di maj dal 1915, cuant ch’al à dovût scjampâ viars l’Italia

par schivâ la vuera. A si è fermât in paîs par dîs zornadis, daspò al è partît par Firenze, indulâ ch’al è restât fin a la fin da vuera.

Al è tornât a Romans al 28 di maj dal 1919 par cuviarzi la carica di aministradôr parochiâl, e un an dopo, al 28 di maj dal 1920, nomenât plevan dal nestri paîs dulâ ch’al è restât fintramài al 19 di setembar dal 1955, cuant ch’al è muart e soterât tal nestri simitièri.

Al è stât, duncja, par ben 55 ains plevan di Romans, brâf a unî dutis lis diviarsis animis politichis in tîmps una vora dificoltôs, subît dopo lis dôs vueris mondialis, fasint capîgi a ducj che par vivi e progredî in paîs a si doveva lavorâ ducj insieme e dâsi una man l’un cul altri, superant divisions e ideis diferentis. Sòt chel spirt al à ancjemò fondât in paîs doi Circuî pai zovins: al prin, pai mascjos, tal otubar dal 1922; al secont, pa frutis, intal zenâr dal 1924. Al à ancja promovût tantis iniziativis par stâ adûn, come i pelegrinas, ben testimoniâts traviars lis fotografîs mitudis in chist lunari. Un omp nassût pûr e muart cul vistî lînt par vê dât un alc a ducj chei ch’o jerin plui pûrs di lui.

Basti pensâ che cuant che i colonos ch’a lavoravin la tiara da glesia, a si presentavin in canonica par dagi la part ch’a i spietava, lui i domandava simpri ce mût ch’a jera lada la stagjon, e se cualchidun al veva tirât su pôc a causa dal sut o da tempiesta, a lu mandava via disînt: “*tu mi darâs al prossin an se la stagion a sarâ plui buna*”.

Chist al è sòl un dai tancj episodis ch’a jan caraterizât la sô vita e che meritarèssin di jessi ducj contâts. Ma par fâ chist, come ch’a disevi prima, a orès un libri intîr par testimoniâ dut chel che al “Bonsignôr” Galupin al à fât pa înt di Romans.

Edo Calligaris